

A cuminsa instala e 120 tentnan ayera mainta

Menos hende por mira carnaval den LG Smith e aña aki

ORANJESTAD – Esnan cu tin kavel riba LG Smith Boulevard por cuminsa usele caba for di dia 10 di februari bai ariba, segun cu nan ta wordo arma. Ayera e prome 20 nan a cuminsa wordo arma, pa asina completa tur 120 pa mas tarda diabierna awor. Un situacion nobo pa tanto DOW como comunidad, y tin cu wak con esaki lo bai funciona.

Pa medio di un conferencia di prensa di ATA y DOW, a informa con e situacion lo bira unabes cu e tentnan aki keda poni. Tentnan cu ta costa 4.000 pa uno y lo wordo ‘fia’ na esnan cu tin derecho di un kavel, pa 200 florin pa persona pa tent. Cu e tent aki ta bin mara un sin fin di regla pa asina garantisar cu tur cos

lo por cana netje durante e temporada di carnaval 58.

Minister Otmar Oduber tabata visiblemente contento ora cu a informe e momento ey ayera, cu enves di 40 tent, cu tur e 120 tentnan busca tin e logo nobo di Aruba riba dje ubica. Un forma di por tin un miho propaganda pa Aruba pa esnan cu bishita nos isla y haya un bunita bista di e tentnan aki. Nan ta mayoria di color berde y riba dje ambos banda e logo nobo di Aruba imprimi ariba.

Oduber a confirma cu un di e retonan ta cu lo e por ubica menos persona y cu menos persona lo por mira carnaval den LG Smith Boulevard e anja aki debi na e logistica mara na e tent. “Porta nos tin cu alarga e ruta mas, cu nos tin sigur



cu e participantenan no tin problema cune” Oduber a bisa den un forma sonriente, splicando cu esei por ta e unico forma pa percura pa mas persona por mira e festival.

Esaki pasobra, cu binimento di e tent, ta bin reglanan cu ta diferente cu esun di kavel unda cu por pone

un trailer antes. Si antes esnan cu trailer, tabatin un espacio di casi 5 meter dilanti cu tabata publico pa cual hendenan otro di e trailer tambe por a para, esei no ta posibel e biaha aki. E motibo ta cu aworaki esnan cu ta bou di e tent, no por tin stelage bou di dje, cu ta pone cu nan

nivel di mira ta mas abou. Como tal si hendenan bai para dilanti di e tent, esnan bou di e tent dificilmente por mira. Como tal e parti dilanti di e tent e biaha aki tambe ta bira di esnan cu ta bou di e tent, cu ta nifica cu menos hende por para mira carnaval den LG Smith Boulevard. □